

國朝詩人徵略二編

蔡錦泉

字文淵號春帆廣東順德人道光十二年進士官翰林院編修湖南學政有聽桐山館集

錦泉少聰穎有神童之稱未弱冠補弟子員南海謝庶常蘭生奇其文妻以女由是名益噪道光乙酉拔貢辛卯鄉試中式第一名舉人壬辰成進士選翰林院庶吉士散館授編修甲午充順天鄉試同考官乙未入直上書房伴惠邸讀

召對稱

旨

上嘗諭軍機大臣云蔡錦泉學問人品俱好其荷

寵眷如此丙申視學楚南憐才剔弊深得士心適屆拔
萃之年得人尤盛秉性嚴厲有干以私者雖豪強
亦勅罷之卒爲大吏所忌秩滿遂緣永順案落職
而錦泉適以丁嫡母艱歸先後主豐湖端溪講席
造就人才孜孜不倦當道多其才恆以功名相勸
勉時值暎夷犯順戚友醵金代助軍餉蒙

恩賞內閣中書辛丑奉母入都供職天性純孝老而彌
篤生母病衣不解帶者兩月疾大漸泣血禱天欲
割股以和藥妾黃氏窺其意卽剗臂肉一片以進

蓋其得於觀感者深矣母卒錦泉體素豐哀毀至
於骨立如喪父及嫡母時焉扶櫬南旋奉母小影
逢食必薦竟以過哀得心痛疾未終喪而卒生平
好繪事工吟咏著有聽桐山館集

順德縣志

龍江鄉觀音山有寺寺中有碑蔡春帆太史幼時
隨塾師遊寺讀碑文返塾默寫不遺一字惟不解
曩隸二字問之於師蓋其時方八歲也其後三十
餘年廟碑剝蝕字不可辨鄉人詢之春帆春帆追
憶默寫亦不遺一字其過目不忘資稟穎異如此

松軒
隨筆

道光己酉正月三日春帆太史招里中舊遊諸子
劇談暢飲抵暮送客登閣醉眠無疾而逝說者謂
其數年前題呂仙祠楹帖云因果證殊難看殘棋
局光陰試問轉瞬重來幾見種桃道士黃梁炊漸
熟閱遍枕頭世界樂得飽餐一頓做成食飯神仙
竟成語識其然豈其然乎

楚庭耆
舊遺詩

天地間無其理竟有其事迂儒執理以斷必至有
誤紀文達公嘗云無所不有卽理也此真通人之
言蔡春帆太史詩云往往事所有竟爲理所無必
欲爭以理毋乃過於迂固執者其思之

聽松廬
詩話

蔡春帆登黃鶴樓詩云所過無非客能閒便是仙
盡收三楚勝豈藉一詩傳覓句何難事畱題亦偶
然是誰云閣筆誣煞李青蓮四十字一氣揮灑可
掃崔灝題詩太白歛手之謬說

聽松廬詩話

春帆夫人謝里甫太史第四女也淑德貞操聞於
族黨一日語其姨甥劉庚曰人之生平不能載入
國史而省志府志縣志亦難以行遠吾聞詩人徵略
一書海內文人聚焉子盍以聽桐館遺詩并事略
送往請輯入之庶可傳遠庚承命并述其言余乃
歎閨閣中能見及此其卓識過人遠矣

同上

摘句 大造情爲根兩儀物有耦

我與我周旋物與物各適

理所不可爲君子無所苟勢所不能行賢

者甘引咎

寄同里諸戚好

疆宇厯古今沿革遞轉徙不過仍其名謂

是古都鄙毋以書所云泥我足所履

古城漢茅

野今分隸山左曹州東昌二郡余疑與左氏語有牴牾因通其說以俟知者

一條南北界萬古聖神功

黃河

酒緣離索減詩爲性靈多

留別

南北東西路陰晴冷曖天

卸車

大劫幸畱書一卷小心相約夜三更

謂侯進履

貧來家室原增累老去功名只自知

翁子負薪

眼前形影燈描出舌上鋒鋷血鍊成

季子刺股

花在筆端誇第一月從弦外記初三

京兆畫眉

水從積雨晴時滿地到羣山盡處寬

曉發萬安

今古水天仍一色賓朋觴詠幾重陽

滕王閣

放櫂幸逢初霽日思家偏值閏清明

舟泊蘭谿

占得大名兼壽考享餘清福到兒孫

隨園題壁

詩懷別後奇無耦骨相生成貴亦貧

送張小埜

雲意預占來歲雪水聲猶似故鄉潮

除夕

日光射赤水成土雲陣刮黃天雨沙

途中
早甚

荒村寂訝無人住老樹喧疑有物憑

途中
所見

鑪邊酒飯茶湯麪門外牛羊犬豕驢

穉子一絲全不挂小姑雙髻却新梳

穉子赤身途中常見今始見詩

聽松
話

白水至今猶一色綠楊到此不三眠

露筋
祠

世路勞勞昏旦晝遊踪歷歷去來今

重遊
平山

秋深樹漸如人老菴靜僧惟望客來

桃花
菴

由宋而來公不朽有湖如此遯真肥

林處
士墓

向來心迹千人口歸去生涯一架書

有感

國朝詩人徵略二編卷六十四

番禺張維屏子樹輯

鄭 棻

字子幹號棉舟廣東番禺人諸生有海天樓詩鈔

寰中詠古三百首

番禺有奇秀才才奇性奇貧奇病奇詩尤奇忽焉
金章紫綬忽焉卉服草衣忽焉鳳閣鸞臺忽焉漁
莊蟹舍時而銅琶鐵板時而細管么絃時而結珮
攬環時而握刀橫槊語其雄壯則黃河之水廣陵
之濤語其細密則三盆之絲九機之錦語其豪快

則千金買駿一箭穿鵬語其激昂則撾鼓漁陽吹
簫吳市語其清圓則芝田鶴唳柳陌鶯鳴語其靈
變則狗僂承蜩蒙莊化蝶語其富麗則百道旌旗
六宮粉黛語其枯寂則長城白骨荒塚青燐年少
多病百憂感其心家貧無書千卷貯於腹或謂其
獨吟獨笑目中無人或謂其如醉如癡心中無我
篋有千首而囊無一錢才可萬言而名艱一第嘔
心落魄竟以此終卒于道光甲午年三十有四余
與君僅兩面君歿十年余乃獲徧覽君之詩君之
爲人余究不得而知也知其詩之奇而已無以名

之名之曰奇秀才

聽松廬
文鈔

鄭棉州喪耦招銘山大令愛其才以女妻之銘山
文筆清矯善騎射工畫蘭竹愛彈琵琶此翁此壻

人謂翁壻雙奇

松軒
隨筆

道光壬辰二月余將之江右一日聞人報客至視
其名刺則鄭棻也余出見之客再拜言棻讀先生
詩久矣聞先生將行特來一見出袖中古詩一篇
中有句云大筆縱橫四十年聽松廬畔松蒼堅須
知實學徵循吏未要虛銜作散仙余賦七律答之
君又賦七律見貽結二句云鯨魚翡翠真源在欲

把心期證法家君於人落落而於僕殷殷殆所謂
文字緣耶君詩甚富遺稿數十卷其妻叔招鶴舟
爲珍藏謀梓以行見者歎爲必傳信非阿其所好

聽松廬
詩話

雜詩

茹荼苦在心食蓼苦在口問君胡爲然固窮堅所
守朝興原憲歌暮醉王郎酒慷慨從中來風雲倒
飛走大樂非田園大憂非畎畝王孫恩一飯英雄
淚三斗倚劍臨高臺望古一回首

偶讀棉舟此篇豈得以尋常詩人視之

聽松廬
詩話

將進酒

牽不盡兮山海情喚不醒兮浮閭夢人閒若無麴
蘖生肝腸觸處堪悲痛吐不盡兮風雲氣結不了
兮花月緣人生若少醉鄉侯逍遙何處求神仙葡
萄綠珍珠紅莫使小蠻半刻空巨觥浮大斗酌地
爲席兮天爲幕一身明月四圍花坐臥其閒好行
樂君如抑塞悲奇才聽我一曲歌莫哀四序兮春
秋百歲兮水流開花兮落葉紅顏兮白頭王侯將
相均朽骨樓臺宮闕皆荒邱洋洋魚兮惠子蘧蘧
蝶兮莊周野馬螭蚺皆同遊蠅頭蝸角毋爲求我

欲傾滄海爲碧醪舉泰山爲金甌但能常醉芙蓉
樓何妨盡典鸛鷖裘爲君歌爲我舞千古英雄一
抔土利鎖名縉徒自苦今朝芳宴我留賓明日歡
場人作主

渡揚子江

大江滾滾如洪洋雲濤日夜排天閭西奔東注怒
莫遏勢同萬馬衝沙塲風聲水聲那可辨但覺宇
宙浮青蒼天南山川苦卑靡賴有此境能豪強來
同淮淶并汝泗包以吳越兼荆襄烟霞三山遠滌
蕩干戈六代徒飛揚我思昔年飲馬客誰倚盛氣

吞蒼茫紫氣英雄略可數寄奴老子差堪當高歌
未許曹孟德醺酒或愛吳周郎下逮齊陳不足道
何況蝸角稱南唐江山亦似解人意早驅混濁歸
淪亡酒色乾坤洗刷淨乃使日月涵真光邇來澄
清局已久烏豚白薊安馴良南北津途更少滯一
任四海通帆檣我今乘舟快飛渡未要擊楫停中
央江南風花江北柳直可櫟括歸奚囊魚龍見我
各起舞豈欲祈我新詩章銅琶且唱大江去紅塵
今古皆蒼涼

日本刀歌

赫連之刀空吐芒花苗之刀虛純鋼金精炫出日
本製白氣萬道橫青蒼瘞山舊聞虎豹死淬水或
訝蛟龍長豈彎蓮鏐劍抑拗梨花鎗得知扶桑真
火幾鍊冶乃使陰陽二氣合一爲風霜我曾搆自
紅毛國飾以珠靶懸以璫每當弔古觸奇憤覺有
風雨來其旁中夜燈前忽起舞直與北斗相低昂
無數人頭入醉眼啾啾鬼哭星無光千辟萬灌銳
若此千金寶鞘何能藏刀兮刀兮爾莫狂且纏錦
帶隨干將卽今戈矛遲遲徵狐兔猶未誅兇殃
天朝斧鉞大炳赫小醜不直勞侯王爾今負此犀

利質胡不效技趨沙場馬前一斬負隅獸或與瑀
弓羽箭永遠銘旂常

登臺

風雲莽莽一登臺宇宙堂堂倦眼開千古空傳橫
海略九州誰擅挾天才遙干北斗多詩筆倒臥南
山有酒杯鳴鶴聲孤休涕淚伏龍年少本蒿萊

洛陽詠古

周南舊化杳如烟古驛重關氣莽然緱嶺鶴歸明
月夜桃林牛散夕陽天三川王會思今日九鼎神
京壯昔年風雨陰陽營洛意可堪宏業盡東遷

燕趙詠古

居庸關勢敞青霄天府雄州萬里遙白日長城秋
牧馬黃雲大漠夜盤鵬周宣石鼓形斑駁郭隗金
臺氣寂寥千古幽原豪俠地未堪持酒酹燕昭

汴梁詠古

黃沙飛點大梁城百萬蒼頭失勁兵虎圈鬚眉空
賈勇鴻溝界限早分明地當博浪悲歌易人到夷
門慷慨生莫問信陵諸食客報恩從古少侯嬴

秦中詠古

黑水黃河一氣來秦關秋色敞然開二陵風雨沈

王業三輔烟雲鬱霸才星宿海流包地轉崑崙山
勢擁天迴美人豪士今何在滿眼蒼茫客易哀

金陵詠古

羣雄銷盡大江昏虎踞龍蟠壯莫論風泣兵戈前
士女雲沈酒色舊乾坤千秋豔事青箱記六代閒
愁白板門金粉南朝談不得烏啼曲在杏花村

錢塘詠古

莽莽羅平鳥跡消開門節度起唐朝干戈地擁王
侯正錦繡天開富貴遙十四雄州蟠偉略三千飛
弩敵狂潮如何不伐朱梁去空使江東壯志銷

姑蘇詠古

千仞靈巖落照虛傷春有客遠停輿風花豔寫吳
趨曲山水雄觀越絕書季子高情今愈杳公孫道
術竟何如專諸墓接要離墓指點蘇臺問故墟

維揚詠古

紅橋綠柳古揚州富貴神仙感壯遊馬渡江聲連
地湧龍岡雲影抱天浮千家金粉開花市八代文
章括選樓莫向蕪城談作賦玉杯繁露有春秋

荆楚詠古

浮浮江漢日排空三楚由來氣象雄望遠天飛袖

女雨登高人想大王風隄邊楊柳含愁翠廟口桃
花掩淚紅開國熊渠遺跡杳渚烟何處訪離宮

巴蜀詠古

永安宮殿鎖高秋魚水君臣大業休早望天心迴
木馬終憐地險失金牛三巴保障重關險八陣威
靈異代留昭烈名孫諸葛子一般遺恨繞江流

詠史

空勞萬里築長城誰料中華自有兵大業君堪雄
虎視深宵人解作狐鳴三秦法網愁難密六國臣
心苦未平火入咸陽圖籍捲蕭何原不是儒生

百二關河一宴空
鴻門事去惜重瞳
劍花方舞秦山雪
玉斗旋飛楚帳風
屠狗鬚眉工激壯
沐猴心膽欠英雄
玦環三舉情難忍
坐使眞王屬沛公

不讀詩書業自隆
扶危誰抗霍光忠
上林春色方生柳
商邑新君果放桐
此日權謀開僭局
當時圖像賜元公
伊周往事援相例
純駁心源恐未同

桓桓名將上雲臺
立學臨雍治教開
三老喜斟延壽酒
諸儒爭頌說經才
南宮秀士橋前散
西竺金人夢裏來
竟使文風參佛法
千秋流弊至今哀
一夜神光滿室中
生兒如此信英雄
斬蛇手段存

家法汗馬勲勞過沛公富貴貽謀誰節儉皇王
局自恢洪寄奴大業關天授莫漫輕嘲田舍翁

驪山烽火變非常烏道蠶叢舉日傷四海風塵悲
杜甫三唐社稷倚汾陽忠言不納千秋鑑血戰空
餘半段槍從此梨園歌調苦江山情短豔情長

夜半焚香禱至誠香孩兒果應時生周朝故將爲
天子華岳仙人喜太平先見不爲傳子計片言能
解重臣兵斧聲燭影傳疑案誰記當年灼艾情

芙蓉閣上望無聊十載江淮祲不消天地沈沈三
字獄山河耿耿一網謠早教奸鳳高懸首何至飛

龍屢折腰和議行來成底事邦衡名姓動金朝
伽藍一笈啓鴻圖皇覺僧人大業敷金鯉不徵洪
武脉烏龍應葬豫章湖干戈局定詩書貴刑罰章
嚴惠澤枯二世傳來家難起周顛還告太平無

偏安殘局不堪論選舞徵歌歲月昏南渡君臣從
古懦西征將帥幾人存金甌城闕桃花淚玉樹江
山燕子魂深喜王師時雨好風塵洗出繡乾坤
珠江春曉

昨夜虹船趁綺寮春歌催短可憐宵百年鴛鴦纔
同夢萬里魚龍又早潮傍柳花香橫水渡擔花人

影漱珠橋海天一片雲霞曙烘出樓臺似六朝

珠江夏夜

素馨燈下設桃笙涼透蕉紗夢欲成此際祇宜花
供養前身况共月多情雙鬢度曲王之渙半臂禁
寒宋子京夜半忽寒臥起黑甜留不住一天紅日海雞
鳴

珠江

清陰樓閣間松杉目送煙江過客帆別有丰神描
不到綠波人影杏紅衫

摘句 日燒鰲背赤潮浴虎頭青

冰霜新面目風雨古乾坤

春風公子地夜月美人天

人情三月景家計五更心

風霜曾立命歌哭不關貧

路險冬寒逼兒孤母夢隨

萬感銷心血孤根鍊歲華

祇愁儒術淺敢道俗情非

雷霆搜古屋風雨戰文章

含愁常勝日扶病送殘春

情深空有劫愁極轉無詩

萬國祥風生福草九天仙露醉蟠桃
萬井煙閒君子國百花春釀壽皇天
綠楊城北過三月紅豆江南話六朝
奇懷爛漫千鍾酒豪氣縱橫萬卷書
紅地有花宵醉月綠天如水晝眠雲
金側理眞新子夜玉參差奏小涼州
雙溪繞屋鷗同住萬樹圍窗鶴對眠
美人夫壻周公瑾才子文章陸士龍
金粉神仙新眷屬江山文藻舊生涯
黃絹細鈔名士傳碧紗重護謫仙詩

九曲黃河天上落三呼神岳日邊開

洛陽

英雄未擊荆軻劍離間先傳樂毅書

燕中

烽火關山唐右國神仙樓觀漢西京

陝西

關前波浪堯時黑塞上胭脂漢代紅

河西

岸虎防家無鐵鎖江龍飛渡有樓船

金陵

三尺風雲豪士劍六宮金鼓美人兵

姑蘇

螢苑人歸天寂寞雞臺鬼唱月模糊

雞揚

風雨有愁哀屈子江山無氣惜周郎

荆楚

魚龍夜冷青神水猿鳥秋高白帝城

巴蜀

檣矢遠聞周肅慎關河深繞漢元菟

遼左

大江濤湧英雄去南國花留士女悲

白下

樓影青迷湘竹地詩情紅入海棠天

黃州

開稼不勞楊節鎮看花還感杜司勳

揚州

九派波濤雙畫槳百年風月一琵琶

潯陽

九州險入褒斜谷萬古魂銷灞岸橋

秦中

黑水夜衝元昊陣黃河秋洗赫連刀

夏州

烏喙心殘終喪越蛾眉恩重竟亡吳

吳越

狐媚易嘲曹孟德虎雌難懺佛圖澄

燕趙

雲臺畫裏英雄像綠野堂前富貴身

洛下

萬國峰巒齊拱衛三邊江海大迴環

都門

四海何人哀李白九霄容我嘯孫登

雜感

倦去千秋紛在眼狂來五嶽忽填胸
歡娛自雜英雄淚溫飽何關磊落胸
天當缺漏誰能補春到繁華便釀愁
憂患從來增福慧英雄不幸是清閒
肝腸得酒悲千古湖海論詩隘九州
人無同調傷心易胸有兼營積學難
海內交游生死隔天涯骨肉夢魂孤
青衫未許風塵識黃卷真同性命看
心經百鍊翻成鈍身繫千秋不敢閒

三千世界花爲累九萬情天樹亦紅

懷仙

容易折磨才子氣最難消受美人恩

臨風玉立金屏像臥月香橫繡被身

膽細每驚人語重願違翻恨已情多

也知香重身應貴未必情多命便乖

風流得福原非薄造化憐香未可憑

豔福回頭皆幻境歡場轉眼是相思

待得重逢人又老況兼長別病偏多

恩當入骨情猶幻事到傷心悔已遲

千篇眉史呈金母一卷心經懺玉皇

吳振勃

字興孟號筠齋江南海州人貢生候選訓導有筠齋詩草

筠齋踐履篤實孝友出於天性嘗曰能言百事不如能行一事外驚聲聞不如內盡倫常待貴而揚親於身後不如在生之菽水承歡待富而濟人之貧不如隨時之量力薄助其教子曰正心自不妄視始誠意自不妄語始生平重然諾慎取與善氣藹然古之君子人也博雅多能著書滿家五十後

連舉四丈夫子咸能守其家訓

弁榆山房筆譚

海州板浦場改票鹽銷鬯倍一時嵯賈雲集士之不遇者亦俛趨焉身其地日其事始終無預者許

石華大令吳筠齋歲貢二人而已

古微堂文鈔

陶柳村別駕

應榮

以其妹壻吳筠齋詩草見示余

讀許大令

喬林

所撰吳先生傳又讀魏州牧

源

所

撰墓志知筠齋誠君子人也柳村言筠齋之于世

裕傭書養母惟恐先人所作湮沒不彰亟措貲雕

板以行筠齋善人宜有孝子因并書之

松軒隨筆

蠟梅忽變素心從未見有詠及此者筠齋有句云

猶是黃羅裁廣袂忽因明月悟前生意象頗超又

詠湯圓句云搓處珠璣全在手餐餘星宿便羅

對句尤妙又月色一簾水五字亦佳

聽松廬詩話

標題

擬古

詠史

處衆篇

五古

東海大松

七古

摘句

貧賤隨天地詩書共死生

雪殘畱碎白天遠落空青

慎中須惠愛勤處卽神明

送許石華之官平陰

山橫秦岱浮雲外日擁扶桑大海東

雲臺絕頂

美人名將俱黃土流水青山幾夕陽

遊莫愁湖

買絲笑倩針神女莫繡平原繡杜康

飲酒詩

一院桐陰三徑菊嫩涼天氣雁來初

程宗城

字子維江南海州人諸生有怡怡軒詩鈔

子維以明道伊川爲家法從陶柳村別駕游十有

六年華實並茂幼卽嗜吟裒然成集

龔榆山房筆譚

標題

雜詩

五古

梅花嶺弔史忠正公

七古

摘句

性情苟不真何處來真詩

蛩聲和月墮雁陣帶霜來

青瑣居時輕幼主黃袍加後罷雄兵

讀宋史

再過門牆猶眷戀每經風雨倍纏綿

送別村

大江東去詩情閑半爲英雄半美人

讀道

瞿培

字德田江蘇武進人國學生有德田存稿

德田武進宦裔也重然諾慎取與動必以禮工詩古文詞屢躋場屋入都館劉少司農家與校三分書籍在江南徐州時有舊友貧且病慨然送之歸未抵家卒出橐中金爲摒擋一切生平古道類如此旋遊江右有匡廬小孤諸記與廉訪嚴公貧賤交延之來楚嚴調甘藩遂客安幕凡六年著有德田存稿道光元年卒孤惇裕扶櫬旋里邑人士重其品愛其詩且稱其古範清標可以風世固請登

之僑寓

黃安縣志

陶柳村大令

應榮

寄來德田存稿一卷余展視知

林黼文大令

紹光

宰黃安時延德田入幕德田既

卒大令重其爲人爲作傳刻入黃安縣志僑寓中

又爲作詩序稱其取與必嚴步履不苟黃安盧鏡

亭山長

廣

題德田存稿謂德田有子而詩傳今觀

稿後有其子

悌裕

跋語孝敬之思溢於楮墨信乎

鏡亭之言不虛也德田詩不多而性情既真風格

亦健五言佳句每升唐人之堂七言佳句幾入宋

人之室

聽松廬詩話

標題

述懷四首

五古

楊柳曲

栽秧歌

七古

摘句

昨見汝書來知識亦頗有勸我歸舊廬飢

寒共相守一言須勗汝切勿交損友譬如

植嘉禾先須去稂莠

示裕兒

三輔雄關鎖

居庸關

諸陵野草秋

明十三陵

初月隱高樹微風生夕涼

酒醒人千里天寒月一牀

石卵填街滑魚乾入市腥

病緣衰老得命以賤貧微

年華百歲少心事五更多

富貴悲朝露生平定蓋棺

哭嚴匡山廉訪

月當寒夜疑無色樹近深秋易作聲

九死投荒惟戀主一生飲恨是和戎

洪忠宣祠

鳥爲倦飛爭繞樹人因多病易思家

好詩得處拈花笑小睡酣時食蔗甜

細雨征帆江上路梨花寒食客邊春

十數點雨不礙日三四片雲常在天

步履好遊尋野趣吟詩送老見天真

心如獨鶴常知警身似僵蠶不再眠

難得深山最深處數家茅屋出詩聲

劉潛蛟

字躍然號雨湖廣東順德人有太乙亭詩草

劉雨湖少日能詩工書爲伊墨卿所推許家甚貧
屢困童子試吳臬使知其名欲羅致之使以書謁

陳學使

高慶

雨湖不可洵耿介之士也

小庄說詩

余少受詩法於雨湖師專以漢魏盛唐爲主當時
入粵諸名流如秦小峴侍郎伊墨卿太守皆力爲
推轂乃野言山貌以攬環結佩爲勞家貧喜圖史
偶過市見香光殘本脫裘易之李咸用之典衣買
集杜荀鶴之賣屋添書同茲風趣

汾江隨筆

雨湖師詠彥章句云未必良禽能擇木可憐烈女
不更夫悲其失身表其忠勇一語已括王鐵槍一

生十二石止
齋詩話

雨湖上舍詩專守唐音其赤壁句云三分霸業東

風定兩賦才華明月傳最屬精警華溪
詩話

雨湖南粵王一律頗稱切響詩云不隨逐鹿奪神

州策受任醫妙運籌一代霸圖秦故吏百蠻大長

漢諸侯東南創局開黃屋西北朝天已白頭終古

雄風去銷歇干戈五季又興劉 扶山雨湖父子

工詩梁福草選刻之可謂篤於師門者矣聽松廬
詩話

雨湖梅花村月夜聞笛絕句云空山何處美人家
爲訪仙蹤趁月華萬樹梅花一聲笛梅花村裏落
梅花較之江城五月落梅花尤覺自然入妙

同上

摘句

自天瀉河漢拔地起芙蓉

羅浮

百蠻通北極萬怪汨南溟

朝漢臺望海

秋聲兼雁度山氣逼人青

雙江夜泊

地劃南溟鍾開氣天生砥柱奠中流

秋夜登海

珠得月臺

懷李忠簡

事去有湖歸越女曲終無地宴吳王

姑蘇臺

藥囊縱有無且在七首何難聶政同

荆軻

梁邦俊

字伯明號小厓廣東順德人官太常寺典簿有焚香省過齋詩稿

君爲內閣中書青厓先生之子先生以書畫詩文自娛生平尤樂善不倦君能體親心學文修行博堂上歡嫺舉業兼工詩畫與同邑何小治明經劉雨湖上舍吳星儕茂才及其從弟福草比部相唱和畫學倪迂閒仿二米性仁厚族之貧者月濟以粟人德之則曰此先君之意余率由之不敢忘君雖側室子而嫡母家中落其舅氏與中表無事畜

憂蓋調護周也生平自奉甚約與友交緩急相恤
無吝容邑有地名仰船洋亂石犖确西潦至舟觸
卽壞君謀夷其石築隄俾榜人挽舟有路未果而
卒其嗣君偕其昆仲踵成之往來者相與頌於塗
實君倡始也中翰公沒三年君以營墳塋積勞成
疾工將竣遽卒年三十有六聞訃多痛悼有輟炊
者素善易筮多奇中著易數管窺一卷書影闕隱
人有片語可傳必手錄而品隲之名曰小厓說詩
福草爲刊板以行君屢困棘闈薦而不售僅授例
爲太常寺典簿又不永年人咸惜之然蓄道德能

文章於物亦克有濟人皆謂中翰公有子云君七
齡病疫已篤村童有同病者素非習識忽指君名
作藝語謂明日與俱去明日則又曰彼不去矣其
父善天使之延嗣終喪而後去後繹其言不爽噫

異矣子三植榮候選司務植桐業儒

小厓墓誌
陳勤勝撰

小厓說詩足以叅證舊聞啓發新義佳篇警句層
出不窮且尤有可貴者古來詩話傳者不下數十
家未有兄弟所撰並行於世者今小厓福草詩話
兩種流播一時萃風雅於一門譬壘篴之迭奏誠

詩話中之佳話

聽松廬
文鈔

小厓題仇十洲畫阿房宮障子七古有云函谷西
來盤磊砢甘泉殿對鴛鴦瓦只嫌當日隱官多七

十萬人猶未寫議論雄傑可稱健句

聽松廬詩話

從兄小厓有霜重履聲澀月低人影長二語吳星
儕謂其過幽似有鬼氣無何病卒詩之有讖然耶

否耶

十二石山齋詩話

摘句

死甯蹈東海生不帝西秦

魯仲連

霜重履聲澀月低人影長

夜起

樓蘭未斬烏孫在除却思親敢望鄉

擬寒下曲

悽絕三山門外路東風一片綠薜蘿

棠然湖

陶應榮

字欣仲號柳村江蘇海州人拔貢生官廣東羅定
州州判歷署始興西甯陽春縣事有柳村詩存
君宅心慈良處事詳慎官粵東十餘年上憲及同
僚皆知君爲忠厚長者省會首縣事繁每有尋常
案件多請僚友代訊壽菊泉大令宰番禺延君在
署問案君必公必慎細心研鞫不肯刑求得其情
則哀矜惻怛之意見於辭色凡蒞一邑愛民禮士
之心汲汲焉如弗及以故歷任始興西甯陽春諸

縣事去後民輒思之

松心
文鈔

柳翁宦粵十餘載所至愛民重士禦暴安良有古
循吏風自奉甚廉而待人從厚在陽春兵差絡繹
遂至勞深累重卒於官署年六十八所治士民聞
之有流涕者

深柳堂
文鈔

許石華先生

喬林

海州名宿也以名進士出膺民

社厯官刺史解組歸主書院講席與柳村自少受
業於先生之門師弟相得最深柳村每見余必稱
述先生既以先生所撰述示余又以余所撰述寄
先生於是余與先生雖神交千里之外不啻晤聚
於一堂今柳村遽作古人吾知先生聞之必懷必

爲傷感也余輓柳村詩云雖作風塵吏無慙彭澤

孫宦途烽火逼書味性情敦夢裏歸心切身邊隻

影存

君臨終時親屬無在署者

知君泉路去念念在師門結句

謂石華先生也

聽松廬詩話

柳翁與予文字交深兩延予襄校春州試卷試畢

邀遊崆峒巖挂笏看山掃苔坐石翁誦其與張小

埜大令

本先

同遊舊作予卽成七古一篇翁謂力

追韓蘇欲合刻巖石間以戎馬倥偬不果

深柳堂詩話

柳村先生嘗鑄小印曰歸來陶令其寄蘭舉弟云

我亦歸心不自持寄內云梅花再放是歸期乃空

上望鄉之臺未著歸田之錄一官流滯隻影伶俜
每讀遺篇時紛哀緒

同上

摘句 淡薄未除寒士氣慈悲宜現宰官身

官能自苦民方樂名尙無求利可知
歡愁要與千家共教養難因一命輕

一經教子科名晚廿載思親涕淚深
十年勞擾趨公日兩字平安望信時
回甘滋味應嘗欖垂老功名在佩弦
豐年未卜魚空夢清俸難分鶴亦飢
已悟虛名同畫餅將收殘局等枯棋

陳瑩達

初名琬以字行號韞堂廣東南海人有樵湖詩
韞堂少日屢試不遇友人邀入鹽務公所公所在
羊城之南爲兩廣鹽務總滙之地其中司事諸友
分理各事引餉韞堂居其一焉在公所五十餘年
勤慎弗懈治事之暇卽手一卷好觀史尤好爲詩
有樵湖詩鈔中多警拔之句卒年七十有五子三
人垣輝彌輝堯輝皆能遵父之訓枋心文鈔
韞堂生平篤友重義嘗出貲恤族戚之貧乏者病
革命其子將親友借券焚之曰無使汝兄弟將來

向人搆訟也此事厚道而達觀故特表之同上

讀詩如見韞堂其人真故其詩真其詩真故其傳

遠無湖詩鈔序
何員外文鈞撰

韞堂讀留侯傳絕句云帝王師以神仙退佐漢功

成賦遂初辟穀冷看功狗戮始終得力老人書謂

留侯得力於老人所見甚卓聽松廬
詩話

韞堂厓門懷古詩云精誠動天地浩氣虹霓吐盡

瘁鞠我躬成敗敢逆觀三忠繼三仁凜然並千古

數語寫三忠大節生氣凜然同上

韞堂白雲洞詩云行行洞漸近聞喧不見瀑不寫

瀑而已得瀑之神

同上

韞堂家西樵山西樵多種茶韞堂采茶歌有云葉
少茶味淡葉多茶味濃淡濃郎領會味在不言中
詠茶而學問之淺深詩文之厚薄俱可借茶味濃
淡類推之

同上

西樵多杜鵑花暮春三月春山如繡韞堂詠西樵
山云巨靈盤鬱湧蓮花拔地芙蓉插漢斜七十二
峰春潑黛東西南嶺曉披霞仙居有跡長留井官
地無閒只種茶最是年年寒食節杜鵑紅裏萬人

家可謂詩中有畫

粵嶽草堂詩話

西樵水碓韞堂句云輪轉杵迫碓尾起瀑流灌輪
輪不止坎臼轟轟聲確聲玉屑霜壑都入水夏夏
獨造形容盡致 九龍泉云泉出雲根聚九龍四
時甘雨澤三農我來閑把軍持汲古寺烹茶聽午
鐘則又清空如話 同上

韞堂堦余禮卿孝廉勸翁刻詩韞翁若以布衣自
歎余曰張船山句云必傳人是布衣多韞翁他日
入詩人徵略必與 國朝諸布衣相輝映也 柳堂詩話

韞堂與家君結吟社遂發憤學爲詩今老矣猶朝

夕披吟弗輟

樵湖詩鈔
歐陽錯跋

摘句

願爲愚拙子不爲輕薄兒

擬古

北海羣推聖西山獨抱忠

讀伯夷傳

三分悲割據兩表竭精忠

讀武侯出師表

東坡傳兩賦赤壁竟千秋

讀赤壁賦

江門存正派雲路壅奇男

李子長墓在雲路村口

孤村三面水落木一天秋

晚秋

遊人湖底出飛鳥石中來

三湖書院

江合滇黔收遠派山分衡楚據高原

羊城雜詠

黃花白蝶昌華苑疎雨寒鴉陸賈城

登粵秀山

生壓六宮花綽約死埋三尺草蒙茸

昭君塚

觚稜夢冷遙天月笠屐心存故國秋

東坡亭

辭章不朽原由我巖壑重興合仗賢

喜邑中諸

先生倡修白

雲洞書院

冤埋熱血千年碧詩詠然灰七字豪

于忠肅

兩鬢豈堪關月照寸心常逐陣雲飛

老將

千山落木生涯地十載幽林大隱人

老樵

難同子鶴林和靖願效騎驢孟浩然

尋梅

寫生最好惟明月得句應難語俗人

詠梅

天下幾人能學杜嶺南多士合宗韓

韻貞剛

一種相思何處寫半林明月半溪雲

憶梅

單子廉

字純夫號小泉廣東增城人附生有小泉詩草

增城何一山

桂林

偕其友單伯騶

玉驥

過余伯騶

出其尊甫小泉茂才詩稿四卷文稿一卷屬爲閱
定余留齋中數月暇日披覽卽其詩想見其人蓋
其性情嗜好在於居今稽古事賢友仁臨水登山
吟風弄月雖名場蹇滯雲路蹉跎胸中了無芥蒂
洵可謂達士曠懷雅人深致者也其詩寫景言情
精者多得於性靈粗者每流於滑率惟五言古體
中讀史數篇識旣高超筆亦老健觀此乃知小泉

有論世知人之識非等尋章摘句之儒惜乎享年

不永未獲卓然樹立也

松心文鈔

讀史

霸王氣蓋世天下分土疆區區一沛郡亭長爲帝

皇義紹擁四州先主無片壤間關入西蜀鼎峙時

四方兵戈亂隋末竇季及鄭王大勢半天下

紛披獨龍姿挺世出一舉清欃槍卽如至正世明

祖起濠梁友諒勢甚銳全楚歸括囊至人大驅除

日月開明光嬰之神器重大福斯能當冥冥固有

屬力征空搶攘

歸之天命有屬最平允

聽松廬詩話

莫雲梯

字橋燕號月卿廣東新會人副貢生有註西銘館

詩鈔

君入泮食餼皆冠軍四試高等三薦鄉闈道光
酉中副榜咸豐壬子選新興教諭君天性孝友贈
公棄養柩停郭外每風雨必往視有貸贈公金者
君念其爲父之友不責償仲弟出嗣至析產仍與
共之三叔母守節撫孤迎養於家四叔祖無後葬
其九櫬族黨貧不能娶者出貲助之歉歲不能餬
口者出粟餽之嘗從遊陳學師師歿爲服心喪其

在新興也教士以通經致用時進諸生飲食之教
誨之貧不能應鄉會試者助以卷金其宅心敦厚
類如此甲寅土匪之亂縣令入山搜捕賊乘虛入
城君躬率士民曉以大義奮勇殺賊賊乃散去卽
日收復縣城時七月九日也君生於嘉慶己未卒
於咸豐甲寅春秋五十有六子三人長文海丙午

科舉人次文烈文龍

松心
文鈔

君服膺西銘有讀西銘詩云誰謂我躬藐人身小
天地胞與言非迂天人本相繫民物苟膜視天地
心何賴宇宙苟虛生此身安足貴乾坤大父母天

命良可畏富貴與貧賤王汝母自棄精警簡括是

能讀西銘而有心得者

聽松廬詩話

土匪之亂君率士民殺賊收復縣城君詩有句云

泮宮本爲獻馘地執訊獲醜殲其元用經確切上

摘句

淵魚有天趣知者樂在水

白沙先生釣臺

星斗秋看劍關山笛倚樓

邊月

花隨秋漸老人與淡相宜

賞菊

五百年前推吏部八千里外泣孤臣

韓江懷古

寒生羅袂氣初覺冷浸銀河星未收

秋夜

一卷離騷三尺劍勞君伴我過重陽

贈菊

李汝梅

字雪庵廣東新會人諸生有聽雪樓稿

君詩富家貧心長命短錄其佳句聊見豹斑

松廬詩話

摘句 一年十二見一見一回新

初月

前路正黃葉高堂方白頭

送黃統四之粵西

薜蘿山鬼嘯蘭芷水仙吟

讀離騷

如虎有人方畏蜀卧龍無力可回天

讀出師表

柴市自甘元鼎鑊小樓猶剩宋山河

讀正氣歌

湖海氣除龍養性滄桑閱過鶴忘年

贈友

是色是空還是夢無生無滅併無禪

卽席

在五倫內者誰非道中人讀四子書者誰非學中人聖賢之道如日中天但患不能行耳宋史別立道學傳乃元人之陋識沿及前明遂以談心性作語錄者爲道學乃薛文清識于謙罪謂謙當斬尙有是非之心乎湛甘泉謂隨處體認天理乃爲嚴嵩作序極其獻諛所謂天理安在乎吳與弼自謂夢孔子來訪而感權奸石亨之恩則自稱門下士李二曲見與夫落水堅坐輿內自謂不動心王畿自謂守良知而在官干請至以不謹被斥此皆自命爲道學者吾不知其

道何道學何學也子曰論篤是與君子者乎色

莊者乎嗚呼非聖人其孰能辨之

松軒
隨筆

魏絳和諸戎強國懋乃績侂冑主恢復挑釁自誅
殛應變苟無術進退皆失策在昔越行成奮志終
破敵少康能中興復纂有夏麻能戰乃能守能守
乃能和和豈作酒醴守豈憑干戈所貴應變人屈
伸智略多

能戰乃能守能守乃能和十字堅確

同上

標題

書陳同甫傳後

七古

摘句

幽馨洗冷翠叢陰閒餽齏

羅浮道中

蒼蒼絕壁異境開玉龍劈峽雙飛來紅霞

翠靄溼天日白波萬丈流瓊瑰

黃龍洞

寫羅浮瀑布數語有太白神氣

聽松廬詩話

碧漢澹微月空山橫素琴

擬王右丞

行隨雲影散坐到月明歸

擬右丞歸朝川作

夢惟幽鳥喚閑有白雲知

擬右丞終南別業

精忠三大節風雅十先生

謁大忠祠訪抗風軒

霜葉丹青畫雲烟水墨天

秋色

柿栗滿深島梅花園一村

羅岡

我求塵外士君是眼中人

贈陳古樵秀才

誰知檢點爲天子不許蕭閑作大夫

南漢宮詞

碧樹澹烟楊柳笛西風涼露菊花杯

月夜

有才未必無知已不遇何須苦怨人

口號

身雖飄泊難忘舊性近繁華不喜秋

燕子

碧山雪滿春無色露井天寒月有痕

白桃花

南浦白門三月雨東風紅板六朝人

春柳

君身仙骨誰堪擬曠代幽人并美人

梅花

一葉一絲纏不斷代儂心裏寫相思

采桑詞

黃照文

字月山廣東香山人有月山遺草

月山爲香石次子嗜山水喜吟詠有父風詩格老

蒼未弱冠而逝世比之華亭夏存古云

嶺海詩鈔

月山讀書河林夜分一女子猝至自云有仙緣意

若繾綣者翼日而體憊甚旬餘疾瘳徧訪戚友忽

語其幼妹曰吾嘗以某日去一日晝寢久弗興家

人視之則端臥逝矣年僅十八時嘉慶庚辰六月

廿八日也啟衣得詩詩曰上帝徵書召丹成拜使

還一從乘鶴去何日到人間澹蕩真吾輩塵勞有

幾閒煙波江上別縹緲入蓬山末云月山沐浴更

衣而逝

聽松廬文鈔

摘句 明月淡紅樹疎鐘寒翠微

山居

閉門春草寂閒坐落花深

山館獨坐

定知慈母意遙念子衣單

新寒

放眼欲觀天地化開編能識古今情

齋中讀書懷

量涵河漢江淮水胸貯嵩衡泰華山

書懷

智識漸開私漸長世情逾淡道逾深

自警

古樹綠園沽酒店夕陽紅餽賣花船

花埭

無可奈何春雁去裁書容易寄書難

春怨

杜洪疇

字乾光號葆初廣東番禺人國學生有求可知齋詩鈔

葆初爲洛川學博長子生而嗜學弱冠爲文光昌充滿書院肄業其首取之文已選入粵秀課藝惟短於小題故久困童子試粵東科試錄遺監生應考者千人而取者不及十之一去秋遺才榜發葆初冠軍師友期望益切乃薦而不售而葆初奮志不懈課徒之暇溫諸經必熟而後已天性孝友篤於骨肉今春其妻子先後患病屢瀕於危葆初料

理醫藥晝夜憂勞迨妻子獲安而葆初遂病一日
熟寐不醒家人視之已化去矣時道光庚戌二月

十八日也年三十三聞者皆歎惜之

聽松廬
文鈔

珠江靡麗自昔已然居人結習固綺障之難銷遊
客遠來亦迷津之屢墮葆初早空色界獨守書城
戚友邀赴花筵每託故而避去亦少年場中所僅

見者也

松軒
隨筆

摘句 偃草自存君子德披襟何愧大王雄

風

從龍有志爲霖雨伴鶴無心帶夕曛

雲

鰕生不識閒遊樂獨與文章有夙緣

和謝
茹坪

廖松

字夢生廣東南海人道光十九年舉人官
永安訓導署東安訓導有睫巢吟草

先兄幼聰慧性孝友忼爽有志節甫就傳卽解韻
語見先府君吟詩輒背誦之初赴童試名噪前列
閱三考而進庠閱三科而鄉薦迺八上公車逆風
鍛羽謁選以教職用南歸閉門不出爲經世之學
凡鹽漕水利諸政靡不盡心研究考古證今洞悉
利病人皆以不竟其用爲兄惜然出其餘緒卒能
保障鄉閭足見留心經濟之驗云甲寅六月紅匪

倡亂衆至數萬賴

朝廷威靈大憲鎮靜發蹤指示將士用命烏合之寇
漸次翦滅乙卯春賊棄陸就水有船數百聚於黃
埔新造等處先兄首請大憲設局團練捐貲募勇
備火藥器械所招鄉勇皆勇敢善戰故能生擒渠
魁陳松年等陳松年者以拳勇聞殆百人敵也新
造陳村大良九江諸捷先兄所招勇與有力焉先
兄感激時事慷慨條陳動中欸竅當道恒器重之
以團練局事積勞成疾卒於家時丙辰二月也年
四十八所存詩若干首分爲二卷

先兄事略
詩謹述

夢生孝廉與余鑑兒同登己亥鄉榜歿後令弟竹
生司馬爲述事略并其遺稿由洗雲樵水部交來
余披覽數過其詩溫厚和平熟於史事其論古能
獨出心裁多未經前人道過至無題諸作亦頗纏
綿悱惻善於言情觀竹生所述又知其有幹濟之
才乃享年不永士論惜之

松心
文鈔

廣東每有西水之患西水發源於牂牁合貴州諸
水廣西諸水至廣東入海水之來源今與古無大
異水之去路今與古大不同何也廣東百年以來
沿海所築沙田不知幾千萬頃水路愈狹水行愈

遲不能下行勢必旁潰數十年後水患不可問矣

余於二十年前卽有此論

詳見桂遊日記

今觀夢生癸巳

紀事詩

夢生自註云焦虎諸門爲粵水出海要津近沿海新成沙田何止萬頃水口愈狹水

道愈淤內河日淺內患日深

所見與余同夢生留心經世之學

又有治事之才乃遽赴玉樓不獲施於實用良可

惜也

聽松廬詩話

夢生詠史云晦者拙所便達乃發其伏一出竟如

斯何如高閣束數語包羅史事王莽著早死居然

善人王安石秦檜嚴嵩若不爲宰相何至誤國害

賢受人唾罵可見達而毀名不若晦而免咎也

同上

溫公變新法蔡京曲承旨荆公布腹心終誤福建
子溫公喜蔡京安石喜呂惠卿皆喜其順己也喜
順好諛必敗事夢生此詩可以爲鑑同上

夢生題洗雲樵水部十萬圖十首多警句余最愛

萬竿煙雨一首云環溪三面水藏塢一間屋中有

蕭散人消受平安福寫水竹幽居令人神往同上

標題 感事 潭柘寺以上五古 京口三山 接東

樓 靜逸窩 紀行篇以上七古

摘句 恐傷遊子意強解老人顏北

鐘聲天半寺帆影峽中山 峽山寺

黑叢狼瞰客藍縷犬欺人

荒村

無家頻入夢見面尙疑非

到家

較相對如夢寐句更覺沉警

聽松廬詩話

天空大野驅寒日風急黃沙捲暮雲

潼南

黃塵古道迷飛輓白日橫空冷戰場

空同名句也夢生此聯頗近之

同上

地分南北中原壯天入鴻濛白晝寒

黃河

兩宮誓復應遭忌三字雖無亦殺公

謁岳廟

趙構秦檜不欲兩宮之復則必殺武穆

三字雖無亦殺公可謂誅心之論

同上

蓬海客纔求藥去桃源人早挈家行

秦中懷古

秦皇求仙乃速死秦人避秦乃得仙

同上

談空孰鑒前車覆受禪無如此地多

金陵懷古

受禪無如此地多確是金陵

同上

勸進何人碑竟勒居心如鬼塚皆疑

鄴中懷古

疑塚兩字拆用阿瞞有知無地自容

同上

俠尙至今傾膽易謗多從古立功難

燕中懷古

偏安局到苻離定元氣殘憑太學延

錢塘懷古

大爲陳東諸人吐氣亦見太學可貴

同上

諸姬地偪來封豕三戶功成失沐猴

楚中懷古

鏡裏江山京口月烟中城郭廣陵秋

山登金

天氣漸從山外改詩心多向客邊生

郴州道中

終古江聲趨大別遠天帆影落巴陵

過洞庭湖

波浪欲浮三楚去舳舻分載九江來

岳陽樓

當場紛擁松喬侶娛老真宜菊部名

春熙堂

十載舊遊渾似夢一年今夕又逢除

辛亥除夕

一龕燈火佛光冷半榻茶烟僧味深

長安寺

山中甲子黃農世天上神仙白玉樓

碧雲寺

國計縱緣牛李誤君心原異宋姚時

張文獻祠

十里舳舻千頃月兩河簫管萬枝燈

中秋夜

前明王次回疑雨集妙於言情然未免纖褻

國朝善言情者朱竹垞黃仲則樂蓮裳郭頻伽其最著也廖夢生無題詩有前人筆所未到者偶錄數

聯於左

聽松廬詩話

虛牀怕冷先溫枕濁酒防多強替卮

無題

容有功名關妾分怕彈絲竹感郎年

久向青衫憐落魄敢忘紅拂矢歸心

別船已強琵琶去殘粉空餘蛺蝶癡

傷春

踏徧北邙三十里不知何處葬卿卿

妾薄命詞

死猶惓惓至此乃足當一情字

聽松廬詩話

夢生七言絕句有可採者偶隨意節錄之

聽松廬詩話

一把黃花一樽酒
薜蘿深處讀離騷

村居

東院琴聲西院笛
一齊吹過藕花風

池館

二分明月三分水
欄過吹簫廿四橋

揚州

千古女兒無別術
只將涕笑動人心

桃花廟

優施教驪姬泣烽火
引褒姒笑可證

同上

一舟可渡都無計
不信能將巧與人

乞巧詞

若照岳王墳上例也
應添鐵鑄徐瑛

西湖

岳墳前鑄秦檜于墳前
亦應鑄徐瑛

夢生此論未經人道而實獲我心

同上

岑 澂

字清泰號鐵泉廣東南海人有憇斲山人詩集

憇斲山人詩梁福草比部力任開雕遽遭賊變比部避亂瀕行以原本屬其姬人陳閨娘藏之陳卽山人詩所云紗幘讀書有明霞者也比部恐兩稿俱失以副本付余旋賊劫比部家陳抱篋不放賊疑有異寶刃奪之開篋乃殘編棄去陳以是驚死余攜詩歸藏諸石樓今詩無恙而山人已歿讀其遺集覺山陽聞笛無此蒼涼

華溪詩話

鐵泉性孤僻與余論詩最合余摘其佳者爲摘句

圖並許代梓全集鐵泉以詩寄余云贏得霜花兩
 鬢侵猗山狄穴遍幽尋郝隆老去空蠻語莊舄貧
 來久越吟彈鋏尙懸遊子淚蓋棺長繫故人心平
 生張范知誰識真覺交情較海深今鐵泉已逝讀
 之不禁潸然淚下也

十二石山
齋詩話

南海岑鐵泉黃香石中翰之詩弟子也詩有五千

餘篇最工近體

寄心盒
詩話

岑鐵泉有生壙詩壙在西樵白雲洞乙卯春客死
 羊城其姪攜柩歸葬張翰生都督題曰南海詩人

岑鐵泉墓

嶺南
瑣記

鐵泉畢生苦吟家貧詩富幸中郎之有女慨伯道
之無兒賴有黃香石舍人爲之師梁福草比部爲
之友生前之名有師爲之品題死後之詩有友爲
之保護且出貲付梓俾心血長留固香火之緣深

實師友之誼篤也

聽松廬詩話

摘句 家遠身常賤天寒夢亦歸

水含天地影山入古今愁

灘聲寒入地水氣白吞天

村空與敗瓦門靜閉飢棺

飢棺二字未經人道然左傳言鬼餒有餒鬼則有飢棺聽松廬詩話

羈愁千里夢夜氣五更心

樹聲寒到水花氣自成雲

梅花

溪山供老眼詩酒送餘年

聞香石師有卜居花縣之意

瑟彈湘水愁多少弓墮橋山事有無

蒼梧懷古

恩怨尙難忘息國雨雲偏自傍巫山

息夫人廟

諭蜀漫誇司馬績平蠻先壓伏波才

陸賈祠

吐茵世已無丞相罵座君還學灌夫

灌夫祠

兩世成仙傳父女一生偕壻住羅浮

鮑仙姑祠

漢魏後應無此手羲皇時或有斯人

讀陶詩

直使干戈迴日月不妨歌舞樂功名

汾陽故宅

隻手幾人扶宋社三仁當日繼湯孫

大忠祠

河北不歸周穆駕江南空寫子山哀

題遺山集

風雅直追前五子豆籩還配宋三忠

讀南園後

五先生詩

平生歌舞千番宴末路肝腸百鍊剛

陳雲淙

避地家逃煨燼外著書人老亂離中

顧亭林集

雷聲擘樹知熊過嵐氣成花有麝眠

粵西道中

燈下虎猥啼急雨車前蠶蠶散寒烟

寒風撼楊蛩聲急殘月窺垣虎眼明

土巷汛

風聲作雨將沈樹雲氣扶山欲上天

夏日

賈生年少虛垂涕宋玉情多易感秋

秋日

英雄自古無成局仙佛何妨有劫魔

卽事言懷

羶帽我思裴相國靴刀誰是李臨淮

書感

塵世定多牛馬走古人豈少鳳凰飢

夜作

方朔敢辭飢欲死袁安無奈懶干人

閑居

半世升沈拋酒海百年心力耗詩兵

命原磨蝸生何益魂果騎鯨死亦佳

弔鄭棉洲

飢來臣朔常憂死身後方干敢噉名

寄陳夢林

頡頏嫂猶憎季子負薪妻亦怨朱翁

贈石叔

賁字生涯吾輩業斷金風義古時人

寄梁福草